

Sguard talian sin la Svizra

In numer spezial da la revista «Limes»

DA GUIU SOBIELA-CAANITZ

■ Vegg la Svizra insumma encle-tga? La lindorna che surt da sia chasa stenda ora las cornas a dretga ed a sanestra per vesair quai che curra. Era nus amez l'Europa duain tgittar quai ch'ins scriva en franzos, talian e tudestg per vegnir a savair tge ch'ins patratga e manegia en ils pajais vischins. Ma la vart taliana vegn savens a la curta. A nord da las Alps mancan infurmaziuns da basa davart la vita spiertala d'in pajais limitrof da var 60 milliuns olmas. Per cletg ha noss chantun da poliglots bunas premissas per intermediar en lez regard. Dal 1993, suenter la fin da la guerra fraida è naschida a Roma ina revista da geopolitica; ses num, «Limes», munta per latin «cunfin(s)». «Limes» ha gist edì in numer spezial davart la Svizra. Il volum cumpiglia traïs parts: «La Svizra tenor ils Svizzers», «I na va betg mo per finanzas» e «Las Svizras e nus». I suonda ina preschentaziun commen-tada da la tavla dal cuntegn.

Il pajais pitschen ha il pled

L'emprima contribuziun è da Peter Maurer, fin avríg 2012 secretari da stadi tar il Departament da l'exterior, che vegn lura schef da la Crusch tschna internaziunala. Sco anterius ambassadur tar l'ONU era'l predestinà per tractar ses tema: «Co vegn la Svizra adaquella da pasar dapli?» I suonda Orazio Martinetti, schurnalist da la televisiun italofona svizra, davart: «Neutralitat, identitat e diversitat sco ragischs da l'atgnadat svizra». Lura scriva l'istoricher Thomas Maissen (Universität da Heidelberg) davart l'istorgia da la Svizra aifer l'Europa. Raffallo Ceschi, spezialist dal Tessin dal 19avel tschientaner, infumescha davart las ragischs da la de-

mocrazia tessinaisa. L'autur che suonda na ston ins betg preschentar al public da La Quotidiana: Roger de Weck declera «pertge che l'Europa ans cunvegn». Ils istorichers tessinais Pasquale Genasci, Rosario Talarico e Gianni Tavarini han scrit ensemens in artitgel entitulà: «Mo ina u ventgasis istorgias?» L'expert militar Mauro Mantovani declera pertge che «la segirtad vegn d'ordaifer». Il davos autur da l'emprima part, Andrea Aparo, ha entitulà sia contribuziun: «Mia Svizra»: Qua pon ins mo avair mirveglia.

Economia e finanzas

L'economist Giorgio Arfaras (Turin) avra la seconda part cun in tema ord-vart actual: «Pertge main'ins raps en Svizra?». Lura s'exprima Mauro Guerra davart ina dumonda cuntraversa: «Laud dal secret bancar». L'economist Sergio Rossi (Universidad da Friburg) rapporta davart «la crisa europeica examinada da Berna». Ses collega Georges Haour («International Institute for Management and Development», Losanna) ha scrit la contribuziun: «I na dat betg mo uras da cucu». Lino Terlizzi, redactur economic dal «Corriere del Ticino», numna la Svizra «spussanza pitschna e gronda enina». L'anteriur cuss. naz. Remigio Ratti, parsura da «Coscienza Svizzera», tracta in tema ch'el perscrutescha dapi ses temp da professer a l'Universidad da Friburg ed a la Scola politecnica federala da Losanna: «Geopolitica dals traffics sur las Alps».

In pajais multifar

La terza e davosa part dal carnet da «Limes» rapporta da la varietad regiunala en Svizra. Il scriptur e schurnalist Hanspeter Gschwend, naschì en la citad bilingua da Bienna, examinescha la dumonda: «Exista propi la Svizra germanofona?» François Chérix, au-

tur da «La question romande» (1), ha entitulà sia contribuziun: «La Svizra romanda n'è betg in'invenziun.» Il titel da Marzio Rigonalli (Cureglia/TI), parsura da la Pro Calanca, rinfatscha a l'Italia ch'ella saja memia «fiscale» (pedanta, stricta, rigurusa) cun il Tessin. Roberto Roveda preschenta «il mir da Chiasso». I suonda in text da la scriptura Franca Magnani (1925–1996) che ha vivì a Turitg avant e durant la Segunda guerra mundiala. Fabrizio Viscontini da Faido (Leventina) rapporta da l'anteriura interpresa d'atschal Monteforno tranter Bodio e Giornico (1946–1994). La sociologa Rosita Fibbi rapporta da «l'immigratiun taliana en Svizra»; sia collega Dominique Marie Gross (Simon Fraser University, Burnaby sper Vancouver, B.C., Canada) deditgescha la davosa contribuziun dal volum a: «La politica svizra d'immigratiun: Success u mo cletg?»

Preschentaziun al public svizzer

Il numer spezial da «Limes» vegn preschentà mesemna, ils 29 da favrer 2012, a las 12.30, en l'aula dal Cussegl grond a Blinzuna (2). Il public da l'occurrenza vegn beneventà da Remigio Ratti e Paolo Grandi, parsuras da «Coscienza Svizzera» e da l'«Associazione Carlo Cattaneo» (Ligiaun). Lucio Caracciolo, directur da «Limes», preschenta lur il carnet e respunda a las dumondas dal politolog Oscar Mazzoleni (Universität da Losanna) e da Gianni Gaggini, schurnalist da la televisiun italofona svizra.

1. Losanna (Favre) 2008.

2. Annunzi: **Coscienza Svizzera, c. p. 1559, 6501 Blinzuna. Posta electronica: segretario@coscienzasvizzera.ch. Infurmaziuns: tel. 079 324 11 65.**